

## 每週經課朗誦經文(巴克禮台語漢字)2014/07/27

### 共同經課 - 1 創世記二十九章十五節~二十八節

15 拉班給雅各講：「你雖然是我的親戚，豈通白白做我的工？請給我講，你欲甚麼工錢？」16 拉班有二個查某子，大的名叫利亞，細的名叫拉結。17 利亞目矚卡輪，拉結生做好看。18 雅各疼拉結，就講：「我願為著你細的查某子拉結給你做工七年。」19 拉班講：「將伊嫁互你，卡好互別人，你及我住！」20 雅各就為著拉結給伊做工七年；因為深疼伊，看做幾若日。21 雅各對拉班講：「日期已經滿，求你將我的某互我，我通及伊同房。」22 拉班聚集彼所在的眾人，辦筵席請in。23 到日暗，拉班將伊的查某子利亞送來互伊，雅各就及伊同房。24 拉班將伊的女婢悉帕互伊的查某子利亞做女婢。25 到天光，一下看見是利亞，就對拉班講：「你給我做的是甚麼？我給你做工，豈毋是為著拉結嗎？你啥事騙我？」26 拉班講：「未嫁大的代先嫁細的，佇阮遮無人按呢做。27 你及此個著滿七日，阮就將彼個亦嫁互你，你為著伊閣給我做工七年。」28 雅各就照按呢行。及此個滿七日，伊就將伊的查某子拉結互伊做某。

### 共同經課 - 2 詩篇一百零五篇一節~十一節，四十五b節

1 恁著感謝耶和華，求叫伊的名，佇萬百姓的中間報揚伊的所做！2 著向伊吟詩，向伊唱歌謳佬！談論伊一切奇妙的所行！3 著因為伊的聖名來誇口！尋耶和華的人，心內著歡喜！4 著求耶和華及伊的權能，常常尋見伊的面。5 伊的奴僕亞伯拉罕的後裔，伊所揀雅各的子孫啊，恁著數念伊所做奇妙的事及伊的神蹟，及伊的嘴判斷的話。6 (見詩。) 7 伊是耶和華——咱的上帝；全地攏有伊的判斷。8 伊記念伊的約，直到永遠；伊所吩咐的話，直到千代——9 就是及亞伯拉罕所立的約，對以撒所咒的誓。10 伊閣將此個約對雅各定著做律例，對以色列定著做永遠的約，11 講：我欲將迦南地賞賜你，做你產業的份額。恁著謳佬耶和華！

### 共同經課 - 3 羅馬書八章二十六節~三十九節

26 閣聖神也親像按呢扶持咱的軟蕊，因為咱毋知影著怎樣祈禱照所應該的，獨獨聖神家己用袂講出的吐氣替咱求。27 鑑察人的心的，也知聖神的意思，因為伊照上帝的意思來替聖徒求。28 閣咱知萬項事相及來互疼上帝的人得著利益，就是照伊定著的旨意來受召者。29 因為伊所代先知的，就代先定著in及伊的子的像同款，互伊佇多多兄弟的中間做大子。30 閣所代先定著的就召in；所召的就稱in做義，所稱做義者，就互in有榮光。31 論到諸個事咱欲怎樣講？上帝若為咱，是誰會對敵咱？32 伊既然無惜家己的子，為著咱眾人獻伊，豈無續將萬物白白互咱嗎？33 是誰欲告上帝所揀的百姓啊？稱in做義的是上帝。34 是誰定in的罪啊？基督耶穌已經死，尚且對死人中閣起來，坐佇上帝的大旁，也替咱祈禱。35 是誰欲隔斷咱佇基督的疼？或是患難？或是困苦？或是窘逐？或是枵餓？或是褪裊？或是危險？或是利刀啊？36 親像所記載講：阮為著你的緣故終日受死；看做親像欲剖的羊。37 反轉佇諸個攏總的事，咱對疼咱者得勝到有剩。38 因為我深信無論是死、是活，是天使、是掌權的，是現今的、是將來的，有權能的，39 是高、是深，抑是別個受造的物，攏袂會隔斷咱佇上帝的疼；就是佇咱的主基督耶穌所有的疼。

### 共同經課 - 4 馬太福音十三章三十一節~三十三節，四十四節~五十二節

31 閣設譬喻對in講：「天國親像一粒芥菜子，人提去撒佇伊的園。32 此個是百項種子的第一細，到伊大穰，是卡大攏總的菜蔬，續成做樹，致到空中的鳥來歇佇伊的枝。」33 閣用譬喻給in講：「天國親像酵，婦仁人提去，園佇三斗麵粉的內面，到攏發酵。」44 「天國親像寶貝園佇園裡，人抵著就園密伊，因為歡喜才去賣一切所有的，來買彼區園。45 閣天國親像生理人尋好的珠，46 抵著一粒不止值錢的，就去賣一切所有的，來買伊。47 閣天國親像網拋佇海裡，聚集逐類的水族，48 已經滿，就拖上坪，坐咱，拾好的入器具，毋好的穴擲佇外面。49 世界的路尾亦欲按呢。諸個天使欲出來，對義人的中間來分別歹人，50 穴in佇火爐；佇遐欲有啼哭咬牙切齒。」51 「諸個恁攏會曉得袂？」in講：「會。」52 伊給in講：「所以見若經學士做天國的學生的，是親像家主對伊的庫房提出新舊的物的。」